

8. Priscilla

Handelinge 18:1-4, 18-28

VERWELKOMING:

5 MIN

YSBREKER:

25 MIN

- Hoe ontspan jy die beste?
- Wat is vir jou die beste van jou werk?
- Wat is/was goed van jou ouers se huwelik? Wat is/was nie goed nie?

AANBIDDING:

5 MIN

Laat iemand Psalm 139 in die Bybel voorlees as julle gebed terwyl die res hulle oë toe hou.

BYBELSTUDIE:

35 MIN

Priscilla: Die vrou van Akwila. In die briewe van Paulus vind ons deurgaans in die suiwerder teks die naam "Prisca", Rm 16:3; 1 Kor. 16:19; 2 Tm. 4:19, in Handelinge die verkleinwoord "Priscilla". Dit is opmerklik dat Priscilla dikwels vóór Aquila genoem word, óf omdat sy voor hom gelowig geword het, óf omdat sy meer ywer getoon het.

Lees Handelinge 18:1-4, 18-28 deurdat elkeen een vers hardop lees.

- Priscilla se naam word 6 keer in die Bybel genoem – 4 keer voor haar man se naam (wat teen die kultuurgebruik van daardie tyd was), maar nooit sonder haar man se naam nie. Waarop dui dit? Hoe kan ons in ons huwelike meer so wees?
- In vers 2 hoor ons van die bevel van Claudius. Dit is in 50 nC gegee ná 'n Joodse opstand in Rome oor die verkondiging van Christus. Skynbaar het die Jode hulle Christenbure vervolg. Omdat die Romeine die Christene as 'n Joodse sekte beskou het, het Claudius sommer al die Jode uit Rome verban. Was hierdie gebeurtenis deel van God se plan? Hoekom? Hoe het God al skynbaar "slegte" dinge in jou lewe gebruik?
- Paulus het sy werk as tentmaker gebruik om Priscilla en Akwila (ook tentmakers) te bereik en om hom in staat te stel om sy bediening in die sinagoges te kan doen. Hoe kan jy jou werk gebruik om mense in jou beroep te gebruik en om 'n bediening buite jou beroep te hê?
- In vers 24 lees ons dat Apollos 'n deeglike kennis van die Skrif gehad het. Tog het Priscilla en Akwila vir hom die leer van God nog duideliker gemaak. Is daar 'n verskil tussen om deeglike kennis van die Skrif te hê en om duidelik te wees oor die leer van God? Waar sou jy graag wil groei? Wie kan jou daarmee help?
- Hoe sou jy Priscilla se verhouding en rol beskryf teenoor (a) Akwila, (b) Paulus en (c) Apollos? Wat leer jy hieruit?
- Wat maak Priscilla besonder?

DIENSWERK:**5 MIN**

Bespreek julle dienswerkprojek.

GEBEDSRIGLYN:**10 MIN**

Gee geleentheid vir stilgebed waar elkeen vir die persoon oorkant hom/haar bid. Gee eers vir elkeen kans om te sê waarvoor daar gebid kan word na aanleiding van vandag se gesprek, sowel as vir hulle persoonlik.

ADMINISTRASIE:**5 MIN**